



Bosna i Hercegovina
Federacija Bosne i Hercegovine
Kantonalno tužilaštvo
Kantona Sarajevo

Broj: T09 0 KTPO 0194224 24

Sarajevo, 12.08.2025. godine

KANTONALNI SUD U SARAJEVU

Sudija za prethodno saslušanje

Na osnovu odredbi člana 45. stav 2. tačka i) i člana 241. stav 1. Zakona o krivičnom postupku Federacije Bosne i Hercegovine (u daljem tekstu: ZKP FBiH), **podizem:**

OPTUŽNICU

Protiv:

- **ADNAN KARIĆ**, rođen 1981. godine, sa adresom u ul., po narodnosti Ostali, državljanin Bosne i Hercegovine, JMBG:, po zanimanju sociolog, neoženjen, pismen, završena VSS, nije služio vojni rok, nema čin rezervnog vojnog starješine, ne vodi se u vojnoj evidenciji, nije odlikovan, lošeg imovnog stanja, neosuđivan, ne vodi se drugi krivični postupak;

Zbog toga što je:

U periodu od 05.06.2019. godine do 12.06.2019. godine, na području Kantona Sarajevo, postupajući u svojstvu odgovorne osobe, u smislu člana 2. stav 6. Krivičnog zakona Federacije BiH (u daljem tekstu: KZ FBiH), kao radnik Sparkasse banke d.d. BiH, sa sjedištem u ulici Zmaja od Bosne broj 7., Sarajevo, obavljajući poslove Specijaliste za upravljanje proizvodima i procesima u Sektoru za poslovanje sa stanovništvom, Segmet razvoja i upravljanja proizvodima i procesima, Odjel za upravljanje proizvodima i procesima čiji opis poslova i odgovornosti je propisan članom 4. Ugovora o radu na neodređeno vrijeme broj od 29.03.2018. godine (u daljem tekstu: Ugovor) kao i Odlukom Direkcije za upravljanje ljudskim resursima Sparkasse Banke d.d. BiH broj od 27.05.2019. godine (u daljem tekstu: Odluka), a kojim članom 4. Ugovora i Odlukom je između ostalog propisano da: „Poslovi koje je radnik dužan obavljati obuhvataju ažuriranje podataka o proizvodima u sektoru, sprovođenje tehničkih dorada i izmjena kreiranja akata u cilju osiguravanja primjene internih i eksternih propisa u poslovanju, te sistema ugrađenih kontrola, kao i poslove procesiranja kartičnih fajlova sa transakcijama, monitoring rada bankomata, rješavanje reklamacija vezano za bankomate i kartične transakcije, testiranje bankomata, izmjene ekrana i

uvođenje novih proizvoda koje treba povezati sa bankomatima“, Adnan Karić htijući da sebi pribavi imovinsku korist, koristeći svoju debitnu karticu broj sa ATM terminala Sparkasse Banka d.d. Sarajevo u više navrata vršio podizanje određenih novčanih iznosa, i to: dana 05.06.2019. godine u Importanne centru, ulica Zmaja od Bosne 7, Sarajevo, na ATM terminalu, podigao novac u iznosu od 510,00 KM, dana 06.06.2019. godine u ulici Halida Kajtaza bb, Sarajevo, u tri navrata na ATM terminalu, podigao novac u iznosu od dva puta po 3510,00 KM i jednom od 3010,00 KM, dana 07.06.2019. godine u BINGO TC, ulica Ive Andrića 13, Sarajevo, u tri navrata na ATM terminalu podigao novac u iznosu od dva puta po 3510,00 KM i jednom od 3010,00 KM, dana 10.06.2019. godine ulici Halida Kajtaza bb, Sarajevo, u tri navrata na ATM terminalu podigao novac u iznosu od dva puta po 3510,00 KM i jednom od 3010,00 KM, dana 11.06.2019. godine u ulici Bolnička 28., Sarajevo, u tri navrata na ATM terminalu podigao novac u iznosu od dva puta po 3510,00 KM i jednom od 3010,00 KM, dana 12.06.2019. godine u ulici Bolnička 28., Sarajevo, u tri navrata na ATM terminalu podigao novac u iznosu od dva puta po 3510,00 KM i jednom od 3010,00 KM i dana 12.06.2019. godine u ulici Alipašina bb., Ciglane, Sarajevo, na ATM terminalu podigao novac u iznosu od 3510,00 KM, pa je tako u periodu od 05.06.2019. godine do 12.06.2019. godine ukupno podigao 54.170,00 KM, te je, znajući da će se u sistemu Banke izvršiti rezervacija navedenih podignutih novčanih iznosa na njegovom tekućem računu broj:, a nakon knjiženja transakcija podignutih novčanih iznosa i umanjenje raspoloživog novčanog stanja na računu, u namjeri da izbjegne umanjenje podignutih novčanih iznosa na svom tekućem računu broj, svjesno i htijući, iskoristio svoje ovlaštenje pristupa informacionom sistemu Banke koje je imao kao Specijalista za upravljanje proizvodima i procesima, a koje ovlaštenje mu je dodijeljeno Nalogom za dodjelu korisničkih prava u informacionom sistemu od dana 29.03.2018. godine u skladu sa glavom 6. i 4. Procedure za upravljanje korisničkim pravima pristupa informacionom sistemu Banke broj od dana 21.06.2017. godine, na način da je sobzirom na opis poslova koje je obavljao kao Specijalista za upravljanje proizvodima i procesima, Adnan Karić putem svog „Username,“ koji mu je kao jedinstvena oznaka dodijeljen od strane Sparkasse banke je sa radnog mjesta pristupao sistemu Banke i vršio ručno poništavanje transakcija knjiženih rezervisanih novčanih iznosa koja je upotrebom svoje debitne kartice broj prethodno podigao na ATM terminalima Sparkasse banke u periodu od 05.06.2019. godine do 12.06.2019. godine, znajući da će na takav način rezervisana novčana sredstva koja je poništio ponovo biti operativna na njegovom računu broj, odnosno da će već podignuta novčana sredstva i dalje biti na raspolaganju za korištenje, što je i htio, jer će se u sistemu Banke prikazati kao da se navedene transakcije nisu ni desile, pa su ATM terminali/bankomati na kojim je Adnan Karić vršio novčane transakcije bili knjigovodstveno poravnati, na koji način je sebi

pribavio imovinsku korist u iznosu od 54.170,00 KM, a za koji iznos je i oštetio Sparkasse banku;

Dakle,

- Adnan Karić kao odgovorna osoba u Federaciji BiH, iskoristio svoja ovlaštenja sa ciljem da sebi pribavi imovinsku korist, a koja korist prelazi iznos od 50.000,00KM;

Čime bi:

- Adnan Karić počinio krivično djelo Zloupotreba položaja ili ovlaštenja iz člana 383. stav 3. u vezi stava 1. Krivičnog zakona Federacije Bosne i Hercegovine (u daljem tekstu: KZ FBiH);

II.

Na osnovu odredbi člana 45. stav 1. i 2. ZKP FBiH i člana 71. tačka c), u vezi sa članom 72., 73. i 76. stav 1. i 2. KZ FBiH, predlažem da se osumnjičenom Adnanu Kariću izrekne **Sigurnosna mjera zabrana vršenja poziva, aktivnosti ili funkcije** i to konkretno zabrana obavljanja bankarskih poslova u svim bankama u Federaciji Bosne i Hercegovine u trajanju od 5 (pet) godina, računajući od posljednjeg dana izdržane kazne zatvora, jer postoji opasnost da bi takvo obavljanje moglo poticajno djelovati da osumnjičeni počinu novo krivično djelo vezano uz svoj poziv, djelatnost ili dužnost.

III.

Predlažem da Sud na osnovu člana 212. stav 3. ZKP FBiH, presudom obaveže osumnjičenog Adnana Karića da oštećenoj Sparkasse Bank d.d. BiH“ sa adresom u ulici Zmaja od Bosne broj 7., Sarajevo, **izvrši naknadu postavljenog imovinskopravnog zahtjeva** u iznosu od 54.170,00 KM.

KANTONALNI TUŽILAC